

24-09-2025

खबरां:-

- रेलमंत्री अश्विनी वैष्णव होरें आखेया ऐ जे जात्तरुणं दी सुविधा लेई तौलै गै रेलवे “वंदे भारत स्लीपर” सेवा बी शुरु करोग।
- महाराष्ट्र दे मुखमंत्री देवेन्द्र फडणवीस होर राहत ते बचाव कम्मं दी समीक्षा करने लेई राज्य दे हाड प्रभावत इलाके दा अज्ज दौरा करगंन।
- पच्छिम बंगाल च रात भर बरी दी बरखा कारण मरोने आहलें दी गिनतरी 10 होई गेई ऐ।
- भारत नै पाकिस्तान दी संयुक्त राष्ट्र मानवाधिकार परिषद च सख्त नुक्ताचीनी कीती ते मंग कीती जे भारत दे इलाकें गी ओ अपने कब्जे च रखने दी कोशिश दे बजाए उनेगी खाली करै ते आतंकवाद दा निर्यात करना बंद करै।
- अमरीकी राष्ट्रपति डोनाल्ड ट्रम्प होरें आखेया ऐ जे यूक्रेन, नाटो ते अमरीका दे सैनिक सहयोग कन्नै रुस कोला सारा इलाका वापस लेई सकदा ऐ।
- ते एशिया कप क्रिकेट प्रतियोगिता च अज्ज भारत दा मकाबला बंगलादेश कन्नै होग।

<><><><><><>

Vaishnav Sleeper Trains

रेल मंत्री अश्विनी वैष्णव होरें आखेया ऐ जे तौले गै दंऊ “वंदे भारत स्लीपर” रेलगड्डियां शुरु कीतियां जागंन। कल नमीं दिल्ली च मीडिया गी जानकारी दिंदे होई श्री वैष्णव होरें आखेया जे पैहली ट्रेन नै सारे टैस्ट ते ट्रायल रनें दी प्रक्रिया पास कीती ऐ ते दुई ट्रेन अगले महीने दौरान तैयार होई जाग। उ’नें आखेया जे रातीं दे सफर च नियमित सेवाएं गी यकीनी बनाने लेई दंऊ रेलगड्डियें गी किट्टे शुरु करना होग। “वंदे भारत स्लीपर” ट्रेन च 16 कोच होगंन, जिनेंगी AC First Class, AC-2 Tier ते AC -3 Tier च बंडेया गेदा ऐ। एहू इक हजार इक सौ 28 जात्तरुणं गी लेइयै जाई सकोग ते 180 किलोमीटर प्रति घंटे दी रफ्तार कन्नै दौड़ग।

<><><><><><>

Maharashtra Rain

महाराष्ट्र दे मुखमंत्री देवेन्द्र फडणवीस राहत ते बचाव कम्मं दी समीक्षा करने लेई अज्ज राज्य दे हाड प्रभावत इलाकें दा दौरा करगंन। तेज बरखा ते लोअर टेरना परियोजना चा पानी छोड़े जाने करण टेरना नदी च हाड आई गेदा ऐ जेहदे नै लातूर जिले दे औसा तालुका दा इक ग्राम बुरी चाल्ली प्रभावत होआ ऐ। केई मकान पानियै च डुब्बी गेदे न ते ऐहतियात दे तौरा पर मकामी लोकें गी सुरक्षत थाहरें पर पुजाई दिता गया ऐ परभणी जिले च तेज

बरखा ते पानी छोड़े जाने कारण 36 गाएं पर असर पेया ऐ, जिसलै के छत्रपति संभाजीनगर जिले च जयकवाडी डैम दे सब्भै गेट खोली दिते गेन, जेहदे कारण पैठण च नदी दे सब्भै घाट पानी च डुब्बी गेदे न।

<><><><><><>

WB Rain

पच्छिम बंगाल च रात भर बरी दी बरखा कारण मरोने आहलें दी गिनतरी बधियै 10 होई गेई ऐ। राजधानी कोलकाता बी एहदे गंभीर असर दा समाना करा करदी ऐ। पच्छिम बंगाल दे केंई हिस्सें च रात भर मौलाधार बरखा बरदी रेही जेहदे कारण आम जनजीवन बुरी चाली प्रभारत होआ ऐ। कोलकाता च 8 लोकें दी बिजली दी शाट पौने कारण मौत होई गेई ऐ। शैहरा दी लगभग हर इक सड़क पानी किट्टा होने कारण तला बनी दी ऐ, गड्डियें दी आओ-जाई लगभग ठप्प ऐ, बिजली कटौती, सिडकं पर जाम, रेल ते मेट्रो सेवा प्रभावत ते केंई इलाकें च इंटरनैट सेवाएं पर बी असर पेया ऐ। तेज बरखा दे बाद 60 कोला मतियां ब्हाई डोआरियां रद्द करनियां पेइयां न। सारे स्कूलें-कालजें गी बी बंद रखेया गेदा ऐ।

<><><><><><>

India Pak UNHRC

भारत नै संयुक्त राष्ट्र मानवाधिकार परिषद च पाकिस्तान दी सख्त नुक्ताचीनी कीती ऐ जे ओह भारत खिलाफ बे-बुनियाद ते भड़काऊ ब्यानै कन्नै मंच दा गलत इस्तेमाल करा करदा ऐ। संयुक्त राष्ट्र मानाधिकार परिषद नै 60में इजलास च बोलदे होई जिनेवा च संयुक्त राष्ट्र च भारत दे स्थायी मिशन “क्षितिज त्यागी” होरें आखेया जे पाकिस्तान गी भारत दे इलाकें गी अपने कब्जे च रखने दी कोशिश दे बजाय उसी खाली करना होग ते अपनी अर्थव्यवस्था गी बचाने पर ध्यान देना होग जेड़ी अखीरी साह लै रदी ऐ। उनें एहू बी उजागर कीता जे पाकिस्तान च नेही राजनीति ऐ जेड़ी फौजी दबदबे हेठ ऐ ते डराने-धमकाना ते कन्नै दागदार मनुक्खी अधिकारें दा रिकार्ड ऐ। त्यागी होरें अगगे आखेया जे पाकिस्तान गी आतंकवाद दे निर्यात, संयुक्त राष्ट्र दे प्रतिबांधित आतंकवादियें गी पनाह देने ते अपने गै लोकें पर बम्बारी करने थमां किश समें तगगर दूर करना होग।

<><><><><><>

Donald UNSC

अमरीका दे राष्ट्रपति डोनाल्ड ट्रम्प होरें आखेया ऐ जे यूक्रेन, नाटो ते अमरीका दे फौजी सहयोग कन्नै रुस कोला कबजाए गेदा अपना सारा इलाका वापस लेई सकदा ऐ। ट्रम्प होरें अपनी इक सोशल मीडिया पोस्ट च आखेया जे यूक्रेन लड़ाई लड़ने दी स्थिति च ऐ हा ते ओहदी जित्त उसी परतियै अपने असल सरुप च आहन्नी सकदी ऐ। उन्दे रमै च एहू बदलाव यूक्रेन दे राष्ट्रपति ब्लादीमीर जेलेस्की हुंदे कन्नै बैठक दे बाद आया ऐ ते एहदा इक बड्डे बदलाव दे रुप च सुआगत कीता गया ऐ। अमरीकी राष्ट्रपति हुंदे इस ब्यानै नै संयुक्त राष्ट्र महासभा च जमा यूरोपी नेताएं ते राजनयिकें गी एहदे मतलब गी लेइयै यक्को-तक्की च पाई दिता ऐ।

मर्दे दी टी-20 एशिया कप क्रिकेट टूर्नामैन्ट च भारत दा मुकाबला दुबई क्रिकेट स्टेडियम बंगलादेश कन्नै होग। एहू मैच भारतीय समें मताबक रातीं 8 बजे नै शुरु होने आला ऐ। उआं कल संजा UAE दे अब्बूधाबी दे शेख जायद स्टेडियम च आयोजित सुपर-4 मुकाबले च पाकिस्तान नै श्रीलंका गी 5 विकटें कन्नै हराया। श्रीलंका आसेया दिते गेदे 134 रन्जे दे लक्ष्य दा पिच्छा करदे होई पाकिस्तान नै 18 ओवरें च 5 विकटें पर 138 रनज बनाए। इस जित्त कन्नै पाकिस्तान दे एशिया कप फाईनल च क्वालीफाई करने दे मकसद गी फही जगाया ऐ।

<><><><><><>